

Bide publikoa mahai eta aulkiekin, saltzeko produktuekin edo elementu lagungarriekin okupatu eta erabiltzeari buruzko udal-ordenantza.

ARRAZOIEN AZALPENA	1
Atariko titulua: DEFINIZIOAK	2
Lehen titulua: XEDAPEN OROKORRAK	3
1. artikulua.- Aplikazio-eremua	3
2. artikulua - Helburua	3
3. artikulua.- Baimenak	3
Bigarren titulua: TERRAZAK	3
4. artikulua.- Kokapena	4
5. artikulua.- Okupatutako lekua mugatzea	4
6. artikulua.- Altzarien ezaugarriak	5
7. artikulua. Eguzkitakoak eta eguzki-oihalak	5
8. artikulua. Bestelako elementuak:	6
9. artikulua. Zarata eta ordutegia	7
10. artikulua. Erantzukizun zibileko aseguruak	8
11. artikulua. Altzariak kentzea	8
Hirugarren titulua: JARDUERA KOMERTZIALEI LOTUTAKO BIDE PUBLIKOAK OKUPATZEA	8
12. artikulua. Artikuluen salmenta automatikoa eta joko-makinak	8
13. artikulua. Merkataritza-establezimenduak hedatzea	9
Laugarren titulua: LIZENTZIAK IZAPIDETZEA ETA KUDEATZEA	9
14. artikulua. Organo eskuduna	9
15. artikulua. Prozedura	9
16. artikulua. Ebazpena	10
17. artikulua. Ezeztatzea	10
Bosgarren titulua: ORDENANTZA EZ BETETZEA: ARAU-HAUSTEAK ETA ZEHAPENAK	10
18. artikulua. Lizentziarik gabeko instalazioak	10
19. artikulua. Baimendutako elementuak edo azalera gainditzea	11
20. artikulua. Arau-hausteen sailkapena	11
21. artikulua. Zehapenak	12
22. artikulua. Erantzukizuna aldatzen duten inguruabarrak	12

ARRAZOIEN AZALPENA

Ordenantza honek arautzen ditu, Toki Araubidearen Oinarriari buruzko 7/1985 Legeak eta Administrazio Publikoen Ondarea arautzen duen araudiak —nagusiki 33/2003 Legeak osatzen duenak— ezarritakoarekin bat, hiriko espazio publikoan gaurdaino egin diren askotariko erabilerak, hiriko espazio publikotzat hartuta udalaren jabari publikoko bide eta espazio guztiak, baita beste administrazio publiko batzuen jabarikoak edota titulartasun pribatukoak izanda ere herritar oroaren erabilera publikoari atxikiak dauden udalerriko beste espazio guztiak ere.

Erregulazioaren helburua da espazio publikoak izan ditzakeen erabilera desberdinak ahalik eta modu argi eta soilenean arautzea eta, bereziki, espazio publikoaren

aprobetxamendu berezia edo erabilera pribatiboa dakarten erabilerena, espazio publikoaren erabilera arruntaren (pertsonek guztiei berdin baina modu desberdinean dagokienaren) babes handiagoa lortzeko.

Ordenantza honen xede diren baimenak emateko garaian Udalak bermatu beharko duen herritarren eskubide nagusia bide publikoa pertsona guztientzat irisgarria izatea izango da. Alde horretatik, bai ordenantza honek bai bere aplikazio-egintzek bereziki hartuko dituzte kontuan espazio publikoen irisgarritasunaren oinarritzko baldintzak arautzen dituzten indarreko arauak, oinarrian apirilaren 11ko Eusko Jaurlaritzako 68/2000 Dekretua dutenak (hiri-inguruetakoa, espazio publikoetakoa, eraikinetakoa eta informazio- eta komunikazio-sistemetakoa irisgarritasun-baldintzei buruzko arau teknikoak onartzen dituenak), baita otsailaren 1eko VIV/561/2010 Ministro Agindua ere (espazio publiko urbanizatuek izaera irisgarria eta ez-diskriminatzailea izateko eta horiek erabiltzeko oinarritzko baldintzen dokumentu teknikoak garatzen duena).

Ordenantza honen beste printzipio gidari bat da Eibarko bide eta espazio publikoetan egiten diren erabilera guztiek, bereziek zein pribatiboek, udalak aurretiaz emandako ahalbidetze-titulua edo BAIMENA izan behar dutela, Administrazio Publikoen Ondareari buruzko 33/2003 Legearen 84. artikulua aurreikusitakoarekin bat etorritik.

Azkenik, nabarmendu behar da ordenantza 2006/123/CE Zerbitzu Direktibak, zerbitzuak ezartzeari eta emateari buruzkoak, ezarritakoarekin bat etorritik egin dela. Horrela, Direktibaren eta bere transposizioarako proiektatzen diren arauen printzipioak eta gidalerroak errespetatzen dira. Baimentze-teknika mantentzen da Administrazio Publikoen Ondareari buruzko Legearen 6. eta 84. artikuluetan ezarritakoarekin bat etorritik, baita administrazioaren isiltasun negatiboa ere, Omnibus Legeak egiten duen 30/1992 Legearen 43. artikuluen aldaketan ezarritakoarekin bat. Bereziki, arreta handia jarri da espazio publikoa beren zerbitzu-jardueraren funtsezko oinarri gisa erabiltzen duten zerbitzu-emaleei (ostalariei eta merkatariei) ahalik eta baldintza gutxien eskatzea bermatzeko, espazio publikoaren izaera mugatuaren eta eskasiaren funtsezko premisa, eman daitezkeen baimenen kopurua mugatzea dakarrena, gogoan hartuta. Baimenak emateko garaian inpartzialtasun- eta gardentasun-printzipioak guztiz beteko direla bermatzen da, baita baimenen iraupena mugatua izango dela, baimen horiek ez direla automatikoki berrituko eta jarduera uzten duen emaleak edo berarekin erlazionatutako pertsonak ez dutela abantailarik izango ere. Komunitate-erregulazioaren aurkako edozein baldintza sartzea saihestuko da, eta ezartzen direnak beharrezkoak, proportzionatuak, ez-diskriminatzaileak, argiak, objektiboak, gardenak eta irisgarriak izan beharko dira, eta aurretiaz eman beharko da horien berri. Azkenik, administrazioaren aldetik ahalik eta gehien sinplifikatzeko ahaleginak egingo dira, beharrezkoak ez diren izapide administratibo guztiak ezabatuz, espazio publikoaren erabilera errazteko.

Atariko titulua: DEFINIZIOAK

Terrazak. Mahaiek, aulkiek, eguzkitakoek, eguzki-oihalek, jardinerak eta hiri-altzarien beste elementu mugikor eta desmontagarriak osatutako instalazioak dira, beren jarduera ostalaritzako establezimendu baten gehigarri gisa egiten dutenak.

Erabilera pribatiboa espazio publikoaren zati baten okupazioa zehazten duena da, eta ondorioz espazio hori beste pertsona batzuek erabilia izatea mugatzen edo saihesten da. Erabilera pribatiboak lizentzia edo emakida administratiboa lortzea eskatzen du.

Lehen titulua: XEDAPEN OROKORRAK

1. artikulua.- Aplikazio-eremua

Eibarko hiriko espazio publikoa kale, bide, zirkulazio-bide, plaza, pasealeku, hiribide, parke, lorategi eta bestelako espazio libreek eta hiritarren erabilera publiko edo orokorrera bideratutako beste espazio batzuek osatzen dute, titulartasun publikoa udalarena edo beste administrazio publiko batzuen izan, edo erabilera publikoari lotutako titulartasun pribatukoak izan.

2. artikulua - Helburua

Ordenantza honen helburua da udalaren jabari publikoko eta azalera erabilera publikoa duten jabari pribatuko lursailen aprobetxamenduaren araubide juridikoa erregulatzea, ostalaritzako jardueraren osagarriak diren mahai hankabakarrak edo antzeko instalazioak (barrikak eta mahai altuak, esaterako) dituzten terrazak aldi baterako edo modu iraunkorrean okupatzeari dagokionez. Halaber, jarduera komertzialei lotutako bide publikoko beste elementu batzuen instalazioa erregulatzen da.

3. artikulua.- Baimenak

Bide publikoa ordenantza honetan erregulatutako elementuekin okupatzeak jabari publikoko ondasunen aprobetxamendu berezi eta pribatiboa dakarrenez, aurretiazko baimena behar da, dagokion udal baimena lortuz. Mendekotasun hau bide-segurtasunarekin eta ordena publikoarekin, oinezkoak pasatzearekin eta desgaitasuna duten pertsonen oinarritzako irisgarritasun-baldintzekin erlazionatutako interes orokorreko arrazoietan justifikatzen da, baita ibilgailu-sarbidean, hiriko ingurumenean eta espazio publiko urbanizatuen apainduraren ere.

Instalazioa erantsita duen establezimendua irekitzeko baimenaren titularrak diren pertsona fisiko zein juridikoei bakarrik emango zaie baimena edo lizentzia.

Baimenaren dokumentua eta bere xehetasun-planoa, edo horien fotokopia bana, jardueraren tokian egon beharko dira, eskatzen dituzten agintzaritzako agenteen esku.

Aurretiko eskubiderik eza. Jabari publikoko ondasunen besterenezintasunari eta preskribaezintasunari buruzko oharrekin bat, okupazioa baimendu ahal izateko beharrezkoak diren baldintzak batera betetze hutsak ez du inolako eskubiderik ematen lizentzia lortzeari dagokionez. Udalak, baldintza erreal eta aurreikusgarri guztiak kontuan hartuz, askatasun osoa izango du lizentzia emateko edo ukatzeko, eta interes orokorra interes partikularraren gainetik ezarriko du.

Inolako okupaziorik gabe utzi ahal izango dira oinezko asko ibiltzen direlako Tokiko Gobernu Batzarrak jende-pilaketa handiko tartetzat hartzen dituen lekuak. Halaber, aldi baterako bertan behera utzi ahal izango da lizentzia bidez baimenduta dagoen bide publikoa okupatzeko aukera, jai-ospakizunak, kirol-ekitaldiak edo beste mota bateko gertaerak direla medio, alkatetzaren dekretu bidez.

Bigarren titulua: TERRAZAK

4. artikulua.- Kokapena

Ezingo dira terrazak jarri espaloietan edo oinezkoak ibiltzen diren lekuetan, zona horien zabalera 3 metrotik beherakoa bada. Instalazioak okupatutako azalera ezin izango da inolaz ere espaloia zabalera % 50 baino handiagoa. Gutxieneko oinezkoentzako pasagune libreak 2,00 metroko edo hortik gorako zabalera izango du beti. Oinezkoentzako zonetan terrazan altzariak jarriko dira inolako oztoporik gabeko 3 metro edo gehiagoko zabalera leku bat uzteko moduan, oinezkoak eta ibilgailu baimenduak eta larrialdietakoak pasatzea ahalbidetzeko.

Oinezkoentzat aldi baterako bakarrik egokitzen diren zonetan —asteburuetan gertatu ohi da normalean—, oinezkoentzako lekuaren tamaina zona trafikoarentzat ixten denean bakarrik baldin bada nahikoa, lizentziak eman ahal izango dira zona oinezkoentzat bakarrik uzten denean terrazak jarri ahal izateko.

Espaloietan jartzen direnean, terrazak espaloiko ertzaren lerroan jarriko dira. Oinezkoentzako zonetan, oinezkoen ibilbide irisgarria bidearen erditik pasatzen bada, terraza establezimenduaren fatxadaren ondoan jarri ahal izango da. Kasu berezietan, espazioaren konfigurazio fisikoa dela-eta jarraibide hauek betetzea posible edo komenigarria ez denean, Udalak okupazioaren beste ezaugarri batzuk ezarri ahal izango ditu. Edonola ere, zuhaitzak, zuhaitz-txorakoak, parterreak, hiri-altzariak eta horien sarbideak eta oinezkoentzako pasaguneak errespetatuko dira.

Baimenak establezimenduaren beraren aurrean dagoen lurzoru-zatia okupatzea ahalbidetuko du. Salbuespen gisa, alboko establezimenduari dagokion tartea okupatuta egon daiteke. Terrazak fatxadei itsatsita badaude, beharrezkoa izango da aurretiaz alboko lokaleko titularraren baimen idatzia izatea.

Oinezkoentzako zonen kasuan, baimenak establezimenduaren beraren aurrean kokatutako lurzoru-zatia okupatzea ahalbidetuko du. Salbuespen gisa, luzetarako okupazio handiagoa baimendu ahal izango da, aipatutako okupazioa lehenik dauden erabilerekin bateragarria denean.

Irisgarritasun-araudiarekin bat etorritik, oinezkoaren eskubideari emango zaio lehenetsuna, eta horretarako saltokietara eta atarrietara sartzeko zonak libre utziz jarriko da terraza, horietatik 60 cm aldentuz gutxienez. Halaber, 1,50 metroko zeharkako pasagune libre bat utzi beharko da terrazak okupatutako luzetarako 11 metrotik behin, okupatu beharreko lekuaren ezaugarriak direla-eta bestelako banaketa bat egitea egokiagoa denean izan ezik.

Irisgarritasun-araudiak definitzen duen oinezkoentzako ibilbide irisgarria ez da inolaz ere inbadituko edo aldatuko. Okupatutako azalera hautemangarria izan beharko da, eta ikusteko desgaitasuna duten pertsonentzat arriskutsua izan daitekeen edozein elementu edo egoera saihestuko da. Instalazio hauetako elementuen diseinuak eta kokapenak pertsona guztiek erabiltzea ahalbidetuko dute.

Mahai eta aulkien gehieneko kopurua okupazio-azalera modulu hauen artean zatitzearen ondorioz lortzen dena izango da: 3 metro karratu mahai bakoitzeko.

5. artikulua.- Okupatutako lekua mugatzea

Arau orokor gisa ez da baimenduko mahaiak eta aulkiek okupatutako espazioa bionboen edo pantailen bidez mugatzea.

Gehienez 1 m-ko altuera duten jardinerak eta babeste-elementuak bakarrik jarri ahal izango dira helburu horrekin. Inolako kasutan ez dira finkoak izango, ez dute espazio publikoa pribatu bihurtuko, beti kontserbazio-egoera ezin hobean eta ondo lerrotatuta egon beharko dira eta ezingo dute inolako publizitate-mezurik eduki. Apaindura bertikal zeharrargiak direnean, bi seinalizazio-xingola horizontal izango dituzte hautemangarriak izan daitezten.

Elementu horien modeloak Eibarko Udalaren alde aurretiko baimena izan beharko du.

Espresuki debekatzen da lurzoruan ainguratutako elementuak erabiltzea.

Lurzoru publikoan ezin izango da jarri lizentzian espresuki adierazita ez dagoen altzaririk, dekorazio-elementurik edo lurzoru-estaldurarik.

Egoki irizten denean eta lizentzia lortu ondoren, Udalak lekuan modu argi eta zehatzean seinalatu ahal izango ditu baimendutako gehieneko okupazio-azaleraren mugak, lizentziaren titularraren aurrean.

Aipatutako mugaketa lurzoruaren gainean egingo da Udaleko Zerbitzu Teknikoek definitutako sistemaren bidez, eta ezingo da inolaz ere aldatu edo kendu udalaren baimenik gabe.

6. artikulua.- Altzarien ezaugarriak

1. Mahai eta aulkien materialak terraza muntatzeko eta desmuntatzeko garaian zoladuraren gainean lekualdatzen direnean zoladura ez kaltetzeko eta ahalik eta zarata gutxien sortzeko modukoak izango dira. Terraza osatzen duten mahaiak eta aulkiak ezingo dira PVCzkoak edo antzeko material batekoak izan, eta ahal dela aluminiozkoak edo egurrezkoak izango dira. Altzari guztiek beren euskarri guztiak osorik bilduko dituzten gomazko elementuak izango dituzte, talkak izanez gero edo arrastatuz gero sortutako zaratak saihesteko.

2. Terraza bakoitzak mota bakar bateko aulkiak eta mahaiak erabiliko ditu, eta elementu-mota bakoitzak kolore bakarra izango du. Debekatu egiten da terraza edo mahai hankabakarra osatzen duen edozein elementutan publizitatea jartzea, baita bertako elementu lagungarri desberdinetan ere.

3. Bai eskaera berrietan bai berritze-eskaeretan jarriko diren altzarien ezaugarriak adierazi beharko dira, baita altzarien euskarrien gomazko elementuenak ere, eta horiek guztiek Udaleko Zerbitzu Teknikoen onespena jaso beharko dute.

7. artikulua. Eguzkitakoak eta eguzki-oihalak

Terrazako elementu gisa eguzkitakoak jarri ahal izango dira, arau hauei jarraiki:

- a) Eguzkitakoak jartzeko lizentzia beharko da, eta hori terraza jartzeko lizentziarekin batera eskatu ahal izango da, edo terrazaren lizentzia eskatu ondoren.
- b) Eguzkitakoak tolesgarriak eta desmuntagarriak izan beharko dira, eta ez da baimenduko zoladuran edozein motatako ainguraketen bidez eustea.
- c) Eguzkitakoen hegala ezingo du terrazarentzat baimendutako azalera gainditu, ezta oinezkoak pasatzea oztopatu ere. Espaloiaren lur-arrasetik zabaldutako eguzkitakoen alderdirik baxueneraino 2,20 metroko altuera libre geratzeko moduan jarriko dira.

Eguzki-oihalek beti izango dute maniobra errazen bidez biltzeko aukera. Debekatuta dago eguzki-oihalen perimetroko azalera bertikalak ixtea, baita terrazako zona material zurrun, zeharrargi edo gardenekin estaltzea edo ixtea ere, nahiz eta egitura argi eta

desmuntagarriek eutsita egon. Eguzki-oihalak ere 2,20 metroko gutxieneko altueran egongo dira.

8. artikulua. Bestelako elementuak:

8.1 Barririk eta mahai altuak

Barririk edo mahai altuak jartzeko lizentzia beharko da, eta terraza jartzeko behar adinako zabalerririk gabeko espaloia edo oinezkoak bakarrik pasatzeko zona bat duten kaleetan baimendu ahal izango da.

Dagokion lizentziaren bidez establezimendu bakoitzeko gehienez bi mahai altu edo barrirak jartzea baimendu ahal izango da. Eguzkitakoak jartzeko baimenik ez da inolaz ere emango. Mahai bakoitzeko 2 taburete jarri ahal izango dira.

Mota honetako altzariak establezimenduaren fatxadaren ondoan jarri beharko dira, horrek hartzen duen eraikinaren zatia gainditu gabe, eta kasu guztietan kalean gutxienez 2 metroko zabalera duen inolako oztoporik gabeko espazio librea utziz, oinezkoei pasatzeko aukera bermatzeko. Okupatutako azalera hautemangarria izan beharko da, eta ikusteko desgaitasuna duten pertsonentzat arriskutsua izan daitekeen edozein elementu saihestuko da.

Establezimendu berak ezingo du kale bera terrazarekin eta barrirak zein mahai altuekin aldi berean okupatu.

Mota honetako altzariak egunero kendu beharko dira bide publikotik lanaldia bukatzen denean, eta beharrezkoak diren garbitasun-lan guztiak egin beharko dira. Inolaz ere ezingo dira bide publikoan geratu establezimenduak irekita egoteko duen ordutegitik kanpo.

Salbuespen gisa, bide publikoan mantendu ahal izango dira barrirak edo mahai altuen funtzio bera betetzen duten elementu finkoak edo fatxadari lotuta daudenak. Artikulu honetan erregulatutako beste elementuak bezala, sekzio konstantea izan beharko dute, ikusteko desgaitasuna duten pertsonentzat arriskurik ez sortzeko. Zirkulusektorearen forma izango dute, ez dira fatxadaren lerrotik kanpora 40 cm baino gehiago aterako eta kasu guztietan oinezkoak pasatu ahal izatea bermatu beharko da, gutxienez 2 metroko zabalera duen zati bat inolako oztoporik gabe utziz. Horrelakoak jartzeko lizentzia eskatu beharko da.

Bide publikoa okupatzeagatik tasa ordaintzeari dagokionez, barrirak edo mahai bakoitza bi metro karratuko okupazioa duen azalera gisa sartuko da kalkuluan.

8.2 Berogailuak

Terraza jartzea baimenduta duten ostalaritza-establezimenduen kanpoaldean berogailuak jartzeko baimena izango dute, betiere baldintza hauek betez:

- a. Kanpoaldeko berogailu bat jarriko da, gehienez, baimendutako lau mahaiko.
- b. Berogailu horiek urria eta apirila bitartean jarri ahal izango dira.
- c. Ostalaritza-establezimendu batek kanpoaldeko berogailuak jartzea aukeratzen badu egunero kendu beharko ditu, bide publikoan jarritako gainerako altzariak bezala, horretarako baimendutako ordutegiari jarraiki.
- d. Edonola ere, interesdunak ABC hautsezko itzalgailuak jarri beharko ditu, 21A22 113B eraginkortasunekoak, erraz iristeko moduko leku batean.
- e. Berogailuaren modeloa elektrizitatearekin edo gasa zein kea isurtzen ez duen beste erregai batekin ibiliko da gehienbat.

- f. Elektriakoak ez diren berogailuen artean, azaroaren 27ko 1428/1992 Errege Dekretuarekin, gasezko aparailuei buruzko Europako Erkidegoetako Kontseiluaren 90/396/CEE Direktiban aplikatzekoak diren xedapenak ematen dituenarekin, bat datozen gas-berogailuak bakarrik baimenduko dira. Edonola ere, karkasa batek edo antzeko egitura batek babestuta egon beharko du berogailuak, propano gasa duten elementuak manipulatzeko eragozteko. Ezingo da berogailu horiek eraikinen baten fatxada-lerrotik edo zuhaitz, kale-argi edo beste elementu batzuetatik 2,00 metro baino distantzia txikiagoan jartzeko baimenik eman. *Instalazio horien eskaeran berogailuen kalitate-bermea eta Europar Batasuneko homologazio-ziurtagiria aurkeztu beharko dira, baita PGLen eta bere eratorrien instalazioetan espezializatutako mantentze-epresarekin egindako kontratua ere.*

Hala eta guztiz ere, eta aipatutako berogailuak jartzeari zuzenean edo zeharka eragin diezaioketen hiri-altzarien beste elementu batzuk edo hainbat egoera izan daitezkeela kontuan hartuta, berogailuak jartzeko baimena ukatu ahal izango da xede horretarako egingo den txosten teknikoarekin bat etorritz.

8.3. Aulki korrituak

Espaloia edo oinezkoak bakarrik pasatzeko zona terraza jartzeko behar adina zabala ez denean baimendu ahal izango dira. Fatxadaren planotik kanpora irteten badira, mugikorak izan beharko dira eta egunero kendu beharko dira. 3 m-ko luzera izango dute gehienez ere, eta horiek jartzeko baimena eman ahal izango da soilik kalean gutxienez 2 metroko zabalera duen inolako oztoporik gabeko espazio librea uzten denean, oinezkoei pasatzeko aukera bermatzeko. Terraza duten establezimenduetan ez da aulki korriturik jarriko.

9. artikulua. Zarata eta ordutegia

9.1. Soinu-transmisioaren mailak mugatzea. Adierazitako instalazioen funtzionamenduak ezingo die transmititu ez etxebizitzetara eta ezta bestelako bizitegi-zein ospitale-erabileren barne- eta kanpo-inguruneetara ere ezarritako gehieneko zarata-maila gainditzen duen zaratarik.

Terrazetan ez da inolako musika-aparaturik, bozgorailurik eta abarrik jarriko. Zuzeneko emanaldiak guztiz debekatuta daude terraza-espazioetan, baita ikus-entzunezko ekipamenduak jartzea edo audio- zein bideo-emankizunak egitea ere.

Terrazak eta beren elementuak instalatzeak eta desmuntatzeak inguruko bizilagunei zarategatik eragozpenik ez sortzeko behar adina bitarteko jarriko dira.

9.2. Euskal Autonomia Erkidegoaren esparruan Ikuskizun publikoen eta aisiako jardueren ordutegiak, nahiz jarduera horien inguruko bestelako alderdiak ezartzen dituen ekainaren 17ko 140/1997 Dekretuarekin bat etorritz, **terrazza jartzeko ordutegi baimendua hau izango da:**

a) Ostegun, ostiral, larunbat eta jaiegun-bezperetan:

- Maiatzaren 1etik irailaren 30era: 09:00etatik 00:00etara.
- Urtearen gainerakoan: 09:00etatik 23:00etara

b) Igandetik asteazkenera:

- Maiatzaren 1etik irailaren 30era: 09:00etatik 23:00etara.
- Urtearen gainerakoan: 09:00etatik 22:00etara.

c) Herriko jaiegunetan, Aste Santuan, Inauterietan eta Gabonetan:

- Maiatzaren 1etik irailaren 30era: 09:00etatik 02:00etara.
- Urtearen gainerakoan: 09:00etatik 01:00etara.

Hori guztia, Udalak edo Euskal Autonomia Erkidegoak euren eskumenak baliatzeari dagokionez sar ditzaketen aldaketei kalterik egin gabe.

Oinezkoentzako kaleen kasuan, zamalanetarako ordutegia amaitzen denetik ordu-erdi gutxienez pasatu ondoren jarriko dira terrazak. Terraza jartzeko ordutegiak ez du inolaz ere gaindituko establezimenduaren ordutegi orokorra.

10. artikulua. Erantzukizun zibileko aseguruia

Establezimenduko titularrak izan behar duen erantzukizun zibileko aseguruaren eta suteen aseguruaren polizaren estaldura terrazaren funtzionamendutik erator daitezkeen izaera bereko arrisku posibleetara zabaldu beharko da.

11. artikulua. Altzariak kentzea

Arau orokor gisa, establezimenduaren titularrak mahaiak, aulkiak eta gainerako altzari guztiak kendu beharko ditu egunero; horiek establezimenduaren barnean edo beste lokal batean utziko dira lanaldi bakoitza amaitzean eta okupatutako espazioa garbitasun-baldintza ezin hobeetan utzi beharko da.

Aulki-pilak, mahaiak, barrikak, eguzkitakoak edo terrazako beste edozein elementu lagungarri ezingo dira inolaz ere bide publikoan bildu.

Terrazako altzariak biltegitartzeko behar adina tokirik ez izatea nahikoa arrazoi izan daiteke terraza jartzeko lizentzia ukatzeko edo mugatzeko.

Hirugarren titulua: JARDUERA KOMERTZIALEI LOTUTAKO BIDE PUBLIKOAK OKUPATZEA

12. artikulua. Artikuluen salmenta automatikoa eta jokomakinak

Arau orokor gisa, debekatuta dago espazio publikoa edozein motatako artikuluak saltzeko makina banatzaileak instalatuz okupatzea.

Espazio pribatuetan instalatuta egonik oinezkoek erabiltzeko eremuetatik irisgarriak diren makina banatzaileak, kutxazain automatikoak, telefono publikoak eta antzeko elementuak jartzeko baimena parean gutxienez 2 m-ko zabalera duen inolako oztoporik gabeko eremua dutenean bakarrik eman ahal izango da.

Makina horiek pertsona guztientzat egon beharko dute erabiltzeko irisgarri. Elementuaren diseinuak gurpil-aulkia darabilen pertsona bat gerturatzea ahalbidetu beharko du. Gailu manipulagarriak 0,70 m eta 1,20 m arteko altueran egongo dira.

Jolas eta olgetako aparailuak jartzea, haurrentzako jokoak esaterako, salbuespen gisa baimendu ahal izango da horiek jarri nahi diren espazio publiko zehatzaren egiturak ahalbidetzen duenean, ez badio oinezkoentzako gutxieneko 2 metroko pasaguneari oztoporik egiten.

13. artikulua. Merkataritza-establezimenduak hedatzea

Merkataritza-establezimenduen jarduera espazio publikora hedatu ahal izango da bide publikoa jarduera komertzial bati lotutako elementuekin okupatuz, esate baterako salmentan dauden artikuluen erakusketekin, publizitate-elementuekin, eta abarrekin. Okupazio horiek Udalak aurrez baimena ematearen mendekoak izango dira, eta honek baimena emateko neurtu beharko du dagokion espazio publikoak irisgarritasunaren ikuspegitik horretarako aukera ematen duen; halaber, Udalak bermatu beharko du gutxienez 2 m-ko zabalera duen oinezkoentzako ibilbide irisgarri bat egotea, baita zatiaren okupazioarekin erlazionatutako jarduera komertzialak nahitaezko udal-baimena izatea ere.

Okupazioa merkataritza-establezimenduaren funtzionamendu-ordutegira mugatuko da, eta antolamendu estetiko egokia mantendu beharko du, baita pertsona guztiei irisgarritasuna bermatuko dien eta oinezkoentzako ibilbide irisgarrii eragozpenak edo distortsioak eragingo ez dizkien antolamendu zehatza ere.

Okupazio hauei ordenantza honen hirugarren tituluko 7. eta 10. artikulua aplikatuko zaizkie jarritako elementuen kokapenari eta elementu horiek kentzeari dagokionez.

Kasu bakoitzean, dagokion bide publikoa okupatzeagatiko tasak aplikatuko zaizkie okupazio horiei.

Laugarren titulua: LIZENTZIAK IZAPIDETZEA ETA KUDEATZEA

14. artikulua. Organo eskuduna

Lizentziak emateko organo eskuduna Eibarko Udal Alkatetza da, eta horrek Gobernu Batzarra eskuordetu ahal izango du, indarrean dagoen araudiari jarraiki. Prozedura zehatzaileei hasiera emateko eta horiek ebazteko eskumena duen agintaritza lizentziak emateko eskumena esleituta duen agintaritza bera izango da.

15. artikulua. Prozedura

Instalazio berria egiteko edo dagoeneko emanda dagoen lizentzia bat aldatzeko aurkeztuko diren lizentzia-eskaerak dokumentu hauekin batera aurkeztu beharko dira:

- Establezimenduaren funtzionamendu-lizentziaren fotokopia edo hori emateko espedientearen erreferentzia.
- Jarri nahi diren hiri-altzarien elementu homologatuen zerrenda, horien kopurua espresuki adieraziz.
- Terrazaren kokapen-planoa 1:1.000 eta 1:500 arteko eskalan, okupatuko den azalera, espaloiarene zabalera, iskinetarainoko distantzia, autobus-geltokiak, kioskoak eta bertan dauden hiri-altzarien gainerako elementuak adierazita dituen.

- Xehetasun-planoa 1:200 eta 1:100 arteko eskalan, jarri nahi diren elementu guztiak adieraziz, baita horien mota, kopurua, dimentsioak, kokapena eta okupatuko duten azalera osoa ere adieraziz, eta xehetasun horiek guztiek planoan islatuta geratu beharko dute.
- Terrazako elementuak biltegitratzeko dagoen espazioaren justifikazioa.

16. artikulua. Ebazpena

Eskaera ordenantza honek eskatutako baldintzetan aurkeztuta, eta txosten tekniko eta juridikoa egin ondoren, udal-organo eskudunak ebatziko du legeak ezarritako epearen barnean.

Lizentzia-dokumentuan finkatuko dira instalazioaren eta elementu lagungarrien, okupatu beharreko azalaren, mahaien eta aulkien kopuruaren, indarraldiaren eta beharrezkotzat jotzen diren gainerako berezitasunen baldintzak.

Eskatutako lizentzia ematea egokitzen hartzen ez bada edo eman beharreko baimenak dagoeneko eskatu denarekiko aldaketarik badakar, Udalak entzunaldia emango dio eskatzaileari, egoki iruditzen zaiona argudia dezan.

Eskatzaileak jabari publikoa okupatzeagatik dagokion tasa ez ordaintzeak edo ordenantza honekin bat ezarritako isunak ez ordaintzeak lizentzia ukatzea ekarriko du.

Lizentzia urtekoa izango da eta urte naturalarekin bat etorriko da, eskaera urteko edozein hilabetetan egiten dela ere.

Lizentzian udal-zerbitzu publikoek baimendutako gehieneko okupazio-azalera mugatzeko beharrezkoa ezarri ahal izango da. Ezingo da muga hori gainditu, eta hori horrela izatea establezimenduaren titularraren den pertsonaren erantzukizuna izango da.

17. artikulua. Ezeztatzea

Edonola ere, ordenantza honetan aurreikusitako edozein instalazio lurzoru publikoan jartzeko lizentziak prekarioan emango dira, bertan adierazitako preskripzioak eta neurri zuzentzaileak betetzearen mende egongo dira eta horiek betetzen ez badira ezeztatu ahal izango dira. Ezeztatzea erabakitzen bada, une horretan bertan eskatuko zaio instalazioaren titularrari adieraziko zaion epean kentzeko, horrela egiten ez badu udal-zerbitzuek bere kontura egingo dutela ohartaraziz.

Bosgarren titulua: ORDENANTZA EZ BETETZEA: ARAU-HAUSTEAK ETA ZEHAPENAK

18. artikulua. Lizentziarik gabeko instalazioak

Udalaren jabari publikoko lursailetan nahitaezko lizentziarik gabe jartzen diren instalazioak berehala kenduko dituzte udal-zerbitzuek, interesatuari alkateak emandako jakinarazpenaz gain inolako beste abisurik eman gabe, eta alkateak ondasanak eta horien erabilera komun orokorra ofizioz berreskuratzeko ahalmena erabiliko du. Aipatutako jakinarazpena udal-zerbitzuek ebazpena materialki betearazten duten ekintza berean egin ahal izango da.

19. artikulua. Baimendutako elementuak edo azalera gainditzea

Aurreko artikuluan ezarritakoa hiri-altzarien elementuei eta beste edozeini aplikatu ahal izango zaie, dagokion baimenean jasota ez dauden edo baimendutako baldintzak gainditzen dituzten soinua eta/edo irudia erreproduzitzeko ekipamenduak eta joko-makinak edo makina banatzaile automatikoak barne. Hori guztia, emandako lizentzia edo dagokion berritzea ezeztatzeke aukerari kalterik egin gabe.

20. artikulua. Arau-hausteen sailkapena

Ordenantza honetako arau-hausteak arinak, larriak edo oso larriak izan daitezke.

1) Arau-hauste arinak dira:

- a. Instalazioaren edo bere inguruaren apaindura- edo garbitasun-falta.
- b. Hasierako zein amaierako ordutegia ez betetzea, ordu-erditik beherako aldearekin.
- c. Lizentzia-dokumentua eta xehetasun-planoa ez aurkeztea eskatzen duten agintaritzaren agentei edo funtzionario eskudunei.
- d. Terrazaren zonan edo bide publikoko beste edozein espazio okupatutako produktuak, ontziak edo hondakinak biltegitzea edo pilatzea.
- e. Ordenantza honetan aurreikusitako beste edozein betebeharrak ez betetzea, arau-hauste larria edo oso larria ez bada.

2) Arau-hauste larriak dira:

- a. Urtebeteko epean hiru arau-hauste arin egitea.
- b. Hasierako zein amaierako ordutegia ez betetzea, ordu-erdi eta ordubete arteko aldearekin.
- c. Lizentzia aurreikusten ez diren hiri-altzarien elementuak jartzea edo altzari horien baimendutako kopuruak gainditzea.
- d. Baimendutakoa baino azalera handiagoa okupatzea edo beste mugaketa-baldintza batzuk ez betetzea.
- e. Nahitaezko aseguruak ez izatea.
- f. Bizilagunei edo iragaitzako bidariei instalazioaren funtzionamendutik eratorritako eragozpen egiazatuak sortzea.
- g. Baimendu gabeko musika-instrumentu zein -ekipamenduak edo bestelako instalazioak jartzea.
- h. Baimendutako elementuak egunero kentzeko betebeharra ez betetzea.

3) Arau-hauste oso larriak dira:

- a. Urtebeteko epean hiru arau-hauste larri egitea.
- b. Terrazak, edo ordenantza honetan araututako bestelako elementuak, baimenik gabe edo baimendutako epetik kanpo jartzea.
- c. Instalazioa berehala eteteko agindua ez betetzea.
- d. Bizilagunei edo iragaitzako bidariei instalazioaren funtzionamendutik eratorritako eragozpen egiazatuak sortzea, ordenantza honetan ezarritako baldintzak behin eta berriro eta modu larrian ez betetzeagatik.
- e. Espresuki baimendu gabeko ikuskizun edo emanaldiak egitea.
- f. Funtzionarioei edo agintaritzaren agentei begirunerik ez izatea, beren karguari hala dagokiolako esku hartzen dutenean, edo beren ikuskatze-lanak ukatzea edo oztokatzea.
- g. Hasierako zein amaierako ordutegia ez betetzea, ordubetetik beherako aldearekin.

21. artikulua. Zehapenak

Ordenantza honetan aurreikusitako arau-hausteez zehapen hauek ekarriko dituzte:

- Arau-hauste arinak 301 eurora arteko isunarekin zigortuko dira.
- Arau-hauste larriak 301,01 eta 902 euro arteko isunarekin zigortuko dira.
- Arau-hauste oso larriak 902,01 eta 1.803 euro arteko isunarekin zigortuko dira.

Arau-hauste oso larriak egiteak desgaiakuntza-zehapen erantsia ezartzea ekar dezake, eta zehapen horrek mota honetako lizentziak lortzeko bost urtera arteko desgaiakuntza esan nahi du.

22. artikulua. Erantzukizuna aldatzen duten inguruabarrak

Zehapenak modulatzeko ondorengoak hartuko dira kontuan: ea intentzionalitatez edo errepikatzez izan den, baita sortutako kalteen izaera, urtebetean izaera bereko beste arau-hauste bat egin izanagatik berrerortzea (ebazpen irmo bidez horrela deklaratu denean) eta arau-haustea egiteagatik lortutako irabazia ere.

23. artikulua. Prozedura

Zehapenak jartzeak dagokion espedientearen instruitzea eskatuko du, eta izapidetzea otsailaren 20ko 2/1998 Legeak, Euskal Autonomia Erkidegoko Herri Administrazioen zigortzeko ahalmenari buruzkoak, ezarritakoarekin bat egingo da.

Espedienteari hasiera emateko erabakiak gerora eman litekeen ebazpenaren eraginkortasuna bermatzeko beharrezkoak izan daitezkeen behin-behineko neurriak hartzea agin dezake, legez kanpoko instalazioak kentzea edo horien funtzionamendua etetea besteak beste.